

Futbola

Golfa

Yubero: «la ezinezkoa daukagu baina guk egin beharrekoa egina dugu»

Igandean Lehen Mailara igotzea denboraldia biribiltzea litzatekeela uste du

Asteburu honetan bukatuko da Espainiako Bigarren A Mailako denboraldia, eta Eibar oraindik ere Lehen Mailara igotzeko posibilitateekin dago. Lehendabizi Osasunari irabazi egin beharko dio, eta gero Albacete, Mallorca eta Salamancaren hutsen zain egon. «la ezinezkoa dugu, baina guk egin beharrekoa egina dugu, salbazioa lortzea alegia», dio Yuberok.

Enkoitz Esnaola / Donostia

JAVIER YUBERO atezain irundarra historikoa izan daitekeen partidu bat zelatik bertatik bizitzeko posibilitatea edukiko du igande honetan, Eibar Lehen Mailara igo daitekeelako eta Javier Yubero bera Eibarko atezain titularra izango delako. Neurketa erabakigarria bada ere, jokalariek trankil omen daude: «Igandea iristeko gogoarekin gaude, baina, era berean, lasai ere bai», esan digu.

Eibar, Bigarren A Mailako Liga bukatzeko jardunaldi bat gertatzen denean, bosgarren tokian dago sailkatuta, 65 punturekin. Albacete laugarrenak 66 ditu, Mallorca hirugarrenak 67, Salamanca bigarrenak 68. Merida aurrenak 72 ditu eta Eibarrek ezingo du harrapatu. Besteak bai, ordea. Eta Eibarrek etxean Osasuna hartuko duen bitartean (19:00etan), aurkari zuzenen partiduak hauek izango dira: Leganes (8.)-Albacete, Mallorca-Villarreal (9.), Alaves (11.)-Salamanca. Ez dago erraza, beraz. «Gauza askok gertatu behar dute gu igotzeko. la-ia ezinezkoa dugu igotzea, egia esan. Albacete, Mallorca eta Salamanca sailkapenean hor goian baldin badaude, ekipo onak diren seinale da, eta



Javier Yubero atezain irundarra, Eibarreko entrenamendu batean.

JAGOBA MANTEROLA

Javier Yubero: «Ez dakit Osasunak beste talderen baten maletatxorik izango duen. Ez dit, gainera, gehiegi axola. Nik buruan partidua baino ez dut»

oso zaila izango da azkeneko partidu honetan hirurek huts egitea», dio Yuberok. «Hala ere, Eibarrek baino presio handiagoa izango dute talde horretako jokalariek, haien klubek aurrekontu handia baitute Eibarren aldean. Guk egin beharrekoa egina dugu, salbazioa lortzea alegia, eta orain lasai gaude».

Beraz, Lehen Mailara ez igotzea ez da porrota izango Eibarrentzat. «Guk denboraldi ona egin dugu. Eta orain zerbait lortzea denboraldia biribiltzea izango litzateke».

Baina denboraldia biribiltzeko Osasunari irabazi egin behar,

derrigor gainera. Eta hori ez da samurra izango. «Horixe ez dela erraza izango! Bolada ikaragarri onean da, azkeneko 12 puntuak eskuratu egin ditu eta. Baina, tira, haiek ez dute deus jokoan, salbatuak baitaude; guk, aldiz, asko daukagu jokoan, eta hori nabaritutako da zelai gainean, ezta?». Baliteke, baina maletatxoaren gaia ere atera da azken egunetan eta... «Ez dakit, ez dakit Osasunak beste talderen baten maletatxorik izango duenentz. Ez dit, gainera, gehiegi axola. Nik buruan igandeko neurketa baino ez dut».

Partidua erabakigarria den arren, azkeneko egunetan Eiba-

rreren egoera baino gehiago aipatu da jokalaria batzuen egoera pertsonala: Iker Sarriegik Realarekin fitxatuko du, Aitor Arregi Villarrealera nahi du, Koldo Sarasua Salamancak... «Une honetan horrelako komentarioak izatea ez da oso ona Eibarrentzat, baina ziur naiz Ikerrek-eta alde batera utziko dituztela gai horiek eta buruan partidua baino ez dutela izango», dio Yuberok. X

EEBBetako Irekia irabaziz, urteko bigarren Grand Slam-a nahi du Tiger Woodsek

Jose Mari

Olazabalek ere parte hartuko du bihar hasiko den torneo honetan

Efe / Bethesda

GOLFEKO Grand Slam-ean sartzen den urteko bigarren torneo hasiko da gaur, EEB-Betako irekia. Torneoaren bezperan, Tiger Woods da atentziogune nagusia. Golf jokalaria gazte hau, 21 urte, errekorrak botatzen ari da iazko abuztuan profesionaletan hasi zenetik. Denbora horretan bigarren postura heldu da munduko golf jokalarien zerrendan eta lehenengo postuan dago golf jokalariek lortutako irabazietan. Grand Slam-eko urteko lehen torneo ere (Augustako Mastersa) nagusitasun osoz irabazi zuen.

Horregatik, Woodsek EEB-Betako Irekian egingo duenari begira jarrita daude begirada guztiak. Apustueta bera da faborito nagusia, baina ez du erraza izango irabaztea.

Jose Mari Olazabal gipuzkoarrak ere parte hartuko du torneo honetan. Denboraldi hasieran berriro jokatzen hasi zenean bezain ondo ez du jokatu Olazabalek azkeneko torneotan. Baina, drive-a eta putt- zuzentzen baditu, beste edozeinek adina aukera izan ditzake. X

Yaw Herculesen ariko da utzita

Ghanakoak denboraldi bat jokatuko du han eta ondoren Realera itzuliko da

E. Esnaola / Donostia

JOAQUIM YAW jokalaria ghanatarrak Herculesen jokatuko du hurrengo denboraldian, Realak utzita, eta ondoren atzera berriz Donostiako taldera itzuliko da, atzo hiru parteez hitzartu zutenaren arabera (Yaw, Iñaki Otegi Realeko gerentearekin joan zen hara). Segituan iritsi ziren akordiora.

Ghanako erdilaria gazteari ekainaren 30ean bukatzen zizaiton Realarekin duela bi urte sinatu zuen kontratua, baina Realeko teknikoei uste dute Yaw ez duela erakutsi benetako

balioa bi urteotan, askoz gehiago eman dezakeela alegia. Klub txuri-urdinak jokalaria kontratua beste urtebetez luzatzeko posibilitatea zeukan, eta hala egitea erabaki du. Realeko entrenatzaileek Yaw Herculesen zer egin dezakeen ikusi nahi dute. Ondoren erabakiko dute jokalaria kontratua 1999ra arte luzatu edo ez. Aukera, behintzat, badute.

Jokalaria berari «pena» eman dio Reala utzi behar izanak, baina jokatu egin nahi du eta horregatik erabaki du utzita joatea. «Realak berak proposatu zidan aukera hori. Ongi iruditu zitzaidan eta horregatik onartu dut»,

zioen atzo eguerdian Yaw Alacanten. «Gainera, igande guztietan jokatuko dut. Gaztea naiz —23 urte ditu— eta jokatzekeo premia daukat».

Bi atzeritar gutxiago • Realak, beraz, beste atzeritar bat gutxiago izango du plantilan. Markus Purk ere ez baita egongo. Jokalaria austriarra Realak utzita aritu da denboraldi honetan Austriako Sturm Graz taldean, eta Realak jokalaria kontratua luzatzeko posibilitatea baldin badu ere, ez dio luzatuko. Purkek Vienako Rapidekin fitxatuko du aurki hiru urteetarako. X



SAN MAMES FUTBOL ZELAIA

Astlehena, ekainak 16, 21:30etan

Liga Txapelketa, 1. Maila

ATHLETIC CLUB - REAL CLUB DEPORTIVO

TXARTEL SALMENTA

TXARTELDEGIA: SAN MAMES STADIUMean

Ostiralean, 17:30etatik 20:00etara,
Larunbatean, 10:30etatik 13:30etara.
Astlehenean, 10:30etatik 13:30etara
eta 19:00etatik aurrera.

Jarlekuak	Prezioak
Tribuna nagusia	7.000
Gainerako tribunak	6.000
Aurrealdeak	5.000
Zutikako harmailak	2.000
Haurrak (14 urtetik beherakoak)	500

ERRESERBA ITZAZU ZURE SARRERAK, ATHLETIC-DEPORTIVO PARTIDURAKO, GURE LINEAN. PORTEXPRESS-EK ERREKARGURIK GABE BIDALIKO DIZKIZU ETXERA. GAINERA 10 TRIBUNA ETA KAMISAK ZOZKETATZEN DITUGU. DEITU ORAIN 906 - 35 11 25



Coche Oficial del
Athletic Club

